

Eskubaloia

Bigarren postua jokoan Arrosadian

Portland San Antoniok Ademar Leon hartuko du gaur, lehen itzuliaren amaieran

Portland San Antonio taldeak sailkapeneko bigarren postuari eutsiz itxi nahi du Asobal Ligako lehen itzulia, gaur etxean (19:30) Ademar Leonen aurka jokatu-ko duen partiduan. Bi taldeen artean puntu bakar bateko aldea dago, beraz berdinketa behar dute gutxienez nafarrek toki hori ez galtzeko. Bidasoak Granollers-en jokatuko du (20:45), azken porrotak ahazteko helburuarekin.

Pello Aiestaran / Donostia

ASOBAL Ligan egon daitekeen partidurik interesgarrienetako bat izango da gaur arratsaldean Iruñeko Arrosadia kiroldegian. Aurrez aurre, Portland San Antonio eta Ademar Leon, sailkapeneko bigarren eta hirugarren sailkatuak Barcelona ahalguztidunaren atzetik. Oso lehia parekatua espero da, biak ere oso denboraldi ona egiten ari direlako.

Zupo Ekisoinen mutilek Ligako lehen itzulia ondo amaitzeko aukera dute. Dagoeneko Asobal Koparako txartela ziurtaturik daukate -lehenengo aldiz klubaren historian-, beraz alde horretatik inolako presiorik ez dute izango. Dena den, zaleekin adiskidetu nahiko dute, ez baita ahaztu behar etxeko azken partiduan Portland San Antoniok galdu egin zuela Pilotes Posadaren aurka, partidua kaskarra eginda. Ademar Leon garaitzea litzateke porrot hura ahazteko modurik onena.

Gaurko partidurako, Ekisoinen prest ditu jokalaririk guztiak. Alberto Martin min harturik ibili da azkenaldian, eta Bidasoaren aurka berriz hasi ondoren, txapelketak izan duen hamar eguneko atsedenaldia ezin hobeto etorri zaio erabat osatzeko.



Alberto Martin (10) Bidasoaren aurka hasi zen berriz jokatzen, eta dagoeneko erabat osatuta dago.

JACOBA MANTEROLA

Ademar Leoni irabazteko, berriro ere defentsa izango da gakoa. Manolo Cadenasek zuzentzen duen zazpikoak jokalaririk bikainak ditu, min handia egiten dutenak, eta beharrezkoa izango da adi ibiltzea. Perez Canca zentralari baloia nahi bezala mugitzen uzten ez badiote, asko edukiko du irabazia San Antoniok.

Aipagarria da bi taldeen parekotasuna estatistiketan: San Antoniok 335 gol sartu ditu orain arte eta Ademar Leonek 339; San Antoniok 292 jaso ditu eta Ademar Leonek 298. Goleatzaileen artean, Ademar Leongo Demetrio Lozanok 85 gol daramatza, eta San Antonioko Txetxu Villaldeak 84. Parekoagorik ezin.

Bidasoak garaipen bidera itzuli nahi du • Bidasoa taldeak Granollers-en kantxa bisitatuko du gaur (20:45), bi puntuak lortzeko premiarekin. Ivan Sopalovicen muti-

lek lau porrot daramatzate jarraian (bi Errekopan eta bi Asobal Ligan), eta bolada txar hori nolabait ere eten nahi dute. Gogoratu beharra dago momentu honetan sailkapeneko bederatzi-garren tokian dagoela Bidasoa, azkenak baino bi puntu gehiago soilik dituela. Beraz, gaur galtzea oso larria litzateke.

Asobal Ligako lehen itzulia gaur amaitzen da, eta horrekin batera Koparako postuak banatzen dira (sailkapeneko lehen zortzi taldeak sailkatzen dira). Bidasoak Granollers-i irabazi eta Pilotes Posadak galtzea behar du Kopara joateko, baina momentu honetan hori da jokalaririk gutxien kezkatzen dituen. Izan ere, garrantzitsuagoa da behin-goz partidua ongi egin eta morala hartzea. Inork ez du zalantzan jartzen Bidasoak gorago egoteko moduko taldea duela, baina hori erakutsi egin beharra dago.

ASOBAL-eko SAILKAPENA

1. Barcelona	24 (+112)
2. San Antonio	18 (+43)
3. Ademar Leon	17 (+41)
4. Cantabria	15 (+21)
5. Valladolid	13 (+15)
6. Ciudad Real	13 (+6)
7. Chapela	13 (-21)
8. Pilotes Posada	10 (-34)
9. Bidasoa	9 (-11)
10. Granollers	8 (-29)
11. Cangas	7 (-28)
12. Naranco	7 (-29)
13. Altea	7 (-40)
14. C. Galdar	7 (-46)

Neurketa honetarako, baliteke Ivan Sopalovic serbiarrak Mads Storgaard danimarkarra jokatze-ko moduan izatea berriz, lateral-ia erabat osatuta baitago. Angel Fernandezek, berriz, denbora gehiago beharko du sorbaldan sendatzeko. X

Herri Kirolak

Egurbidek eraman zituen Azkoitiko mantak

Azkoitiarraren uztarriak 46 plaza egin zituen igandeko saioan Sanandresetako idi proba txapelketan

Koldo Alduntzin / Azkoitia

JOXE JOAKIN Egaña Egurbide-
ren idi pareak egin du aurtengo
Sanandresetako idi proba txapel-
ketaren markarik onena: 46 pla-
za, zinta bat eta 1,47 metro. Az-
koitiarraren idiek igandeko saio-
an lortu zuten marka hori, *Lopene*
eta *Iketz*a itzain zituela. Egurbi-
deren idiek 1.130 kilo pisatu zu-
ten eta 45 kiloko gainzama erabili
zuten 1.800 kiloko harri gainean.
Batez beste zortzi plaza egin zituz-
ten bost minuturo.

Astelehen gauean amaitu zen

Azkoitiko idi proba txapelketa
hau, BBK Sari Nagusirako azken
proba puntuagarria, eta horren
arabera, sei uztarririk lortu dute
abendua 6an Mallabian jokat-
tuko den finalerako txartela:
Egurbide, Ezkerra, Lopategi,
Soarte eta Loinaz (bi idi pare).
Asteleheneko azken saioan giro
aparta zegoen, 400 ikusle bildu
zirelako. Tamalez, ordea, plaza-
ren egoerak kendu egin zion
ikusgarritasuna, oso umel eta
labainkor baitzegoen.

Hobekien moldatu zen idi pa-
rea Urretxuko Joxe Salegi Bela-

rrera-rena izan zen, 36 plazarekin
gaueko markarik onena eginez.
Pisu handiko idiak plazaratu zi-
tuen, 1.144 kilo eman zutenak.
Aurreko hiru pareek ez bezala,
gelditu gabe jardun zuten. Egur-
bideren idien lanarekin alderatu-
ta, lan erdiatarako hiru unte zi-
ren azpitik.

Herrikoen omenaldia Belarretari

Belarreta aipatu dugunez, heldu
den abenduaren 14an omenaldia
egin diote Urretxun. Probale-
kuaren egoera ez zen marka han-
diak egiteko modukoa, eta ondo-

rioz, gainerako hiru uztarrien
markak eskasak izan ziren. Ikusi
besterik ez dago! Ezkerraren
idiek 21 plaza egin zituzten lehen
ordu laurdenean, eta hurrengo-
an, 8 plaza eta 3 metro.

Egurbidek jaso zituen, beraz,
garaileari zegozkion 250.000
pezetak eta mantak. Oro har,
aurtengo markak ez dira oso
aipagarriak izan. Iaz, esate bate-
rako, Ezkerraren uztarriak 48
plaza egin zituen. Bestalde,
Gurea pilotaleku-probaleku hau
orain dela 66 urte eraiki zuten
eta berriro egingo dute. X

Udazkeneko I. Jaizkibelgo igoera egingo da igandean

■ Udaberrian parte
hartu ezin duten
pilotuei Jaizkibel
igotzeko aukera eman
nahi zaie

Iruñe Lasa / Donostia

ANDRES VILARIÑO, Xabier Riera eta Iñaki Goiburu goi mailako gidariak ikusteko aukera izango da igandean Jaizkibelgo igoeran. Ikuskizuna ziurtatua dagoela azaldu zuten antolatzaileek atzo aurkezpenean. Gaur itxiko da izen emateko epea eta 56 auto dira dagoeneko izena eman-dakoak.

Horietatik lau barketak izango dira: Andres Vilariño, Luis Martinez, Renzo Napione eta Jose Naredo. Formulako kategorian Luis Rodriguez nafarra ariko da Martini MK-34 batekin eta turismoen mailan azpimarratzekoak dira ikuskizuna eskaintzen duen Xabier Riera bere BMW320i autoarekin, eta Iñaki Goiburu, aurtengo Alfa 155arekin Pribatuen Espainiako Txapelketa irabazi duena. Bergararrak Alfa 155a erabili-ko du Jaizkibel igotzeko eta ZX Kopa irabazi zuenean erabili-tako autoa anaia Karlosi utziko dio. Mendiko Euskadi-ko txapelkun *Lebeiti* eta Juan Luis Sarasola rallyeko euskal txapelketa ere irteeran izan-go dira. Lasterketa zabaltzen, 0 autoa bezala Jon Agirre Euskadiko Auto-kros txapel-duna ibiliko da errepidean oso gutxitan ikus daitekeen auto-az gozatzeko aukera emanez.

Udaberrian egiten den Jaiz-
kibelgo betiko igoeraren pare-
an antolatu da Udazkeneko
Igoera hau, nolabait urteroko
proba horretan parte hartu
ezin dutenentzat. Udaberriko
Igoera Europako Mendiko
txapelketarako puntuagarria
dela eta zenbait autoren parte
hartzea debekatzen du arau-
tegiak. Maiatzeko probatik
kanpo gelditzen ziren pilotuei
beste aukera bat zabaltzen
zaie orain, batez ere Gipuzko-
ako eta Euskal Herriko gida-
riei. Hala adierazi zuen lau
aldiz Europako txapelketa
izan den Andres Vilariño:
«Proba arrakastatsua izango
da, Europako txapelketaren
arautegi zorrotza dela-eta
inoiz Jaizkibelgo Igoera egin
ez duten euskal pilotu asko
bilduko baitira». Antolatzaile-
en asmoa, probak datozen
urteetan jarraitzea da eta,
jada, datorren urtean Euska-
diko Txapelketarako punta-
garria izatea.

Ordutegiari dagokionez,
errepidea goizeko 09:00etan
itxiko da. Lehen txanda
11:00etan hasiko da eta biga-
rren 12:45etan. X